



17. august 2012

UKA 2012/19

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunarput isumaqatigiisummut ilaatinneqariinngippat ILO-mi isumaqatigiisutip 94¹-ip akuerineqarnissaa siunertaralugu naalagaaffimmut saaffiginninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Naaja Nathanielsen, Inuit Ataqatigiit)

Tunngavilersuut

§ 37 najoqqutaralugu apeqqutigineqartartunut arlaqartunut Naalakkersuisut akissuteqartarnermini oqaatigisarpaat, ILO-mi isumaqatigiisummut 94-imut nunarput akuerseqataasimasutut isigineqassanersoq maannamut suli erseqqissumik paasineqarsimanngitsoq. Isumaqatigiisut pineqartoq naapertorlugu sulinermi atukkat akissarsiallu nunatsinni suliffeqarnermi nalinginnaasumik atuuttunit ajornerullutillu annikinneruppata pisortanit suliassiissutit avataaniit tikisitanit suliarineqassanngitsut qulakkerneqartussaavoq.

Danmark-imi Sulisoqarnermut Ministeriaqarfimmit nalunaarusiaq utaqqimaarneqartoq Naalakkersuisunit ilisimatitsissutigineqarsimavoq, nalunaarusiamilu nunarput isumaqatigiisummut peqataatinneqarnersoq erseqqissarneqassalluni. Paasissutissalli naalagaaffimmit maannamut tiguneqarsimasut naapertorlugit nunatta isumaqatigiisummut peqataanera ilimagineqarsinnaalluarpoq. Paasineqassappalli nunarput isumaqatigiisummut peqataatinneqanngitsoq nunatta peqataatilernissaa siunertaralugu naalagaaffimmut saaffiginnittoqarnissaa matumuuna siunnersuutigissavara.

Pisortanut aningaasatigut allaffissornikkullu kingunerisassat

Aningaasaliissutaareersimasut iluini suliassap naammassineqarsinnaanissaa ilimagineqarpoq.

Namminersorluni inuussutissarsiuqarnermut aningaasatigut allaffissornikkullu kingunerisassat

Isumaqatigiisut akuerineqassappat najoqqutarineqalerlunilu Namminersorlutik Oqartussat periarfissai suliffeqarfinnut namminersortunut ingerlatassanut annertuunut aatsitassarsiornernullu akissarsiaqarnikkut, sulinernullu atatillugu atukkatigut nunatsinni nalinginnaasumik atugaasunit allaanerusunik atuisinnaanerinut periarfissat killilerneqassapput. Tamanna suliffeqarfiit aningaasartuutaannik qaffatsitsuussaaq, taamatullu ingerlatsinermi aningaasartuuteqarneq tunngavigalugu suliffeqarfiit pilersaarutiminnik unitsitsisinaanerinik kinguneqariaannaalluni.

Innuttaasunut aningaasatigut allaffissornikkullu kingunerisassat

Akissarsiat pillugit nunatsinni piumasaqaatit inuutissarsiornermik pilersaarutigineqartunik killeqartitsissappata suliffinnik nutaanik pilersitsiortorneq annikilleriaannaavoq. Paarlattuanilli nunatsinni akissarsiaqarnikkut inissimaneq killormut ingerlanniakkani annertuuni annikinnerusumik akissarsiaqartitsisut tungaanniit saatinneqannginnissaanut isumaqatigiisut illersuisuusinnaavoq.

¹ <https://www.retsinformation.dk/Forms/R0710.aspx?id=70061>